

夢

梁

錄

二



夢梁錄卷九

三省樞使諫官

三省、卽尙書省、中書省、門下省。樞密院、國初循唐舊制、置院于中省之北。今在都堂東、上爲樞屬、列曹之所。蓋樞密使率以宰臣兼領、自知院以下、皆聚於都堂治事。省院在和寧門北首。舊福寧寺也。樞密院後建經武閣、係藏經武要略之文。中省門下後省、在都堂後。諫院在後省之西、檢正左右司、在諫院之右。向東、承旨檢詳編修、在樞密院。三省樞密院監門、大門之南。三省樞密院架閣、在制敕院後。御史臺、在清河坊內、北向。蓋取嚴肅之義。內有朝堂、卽臺廳也。自紹興來、未嘗置對。有屬臺臣讞問、則刑察就聽于大理寺問罪矣。

六部

六部、在三省樞密院之南。部之中堂、名曰論思獻納之堂。吏部掌天官、依唐制以文武有官人分左右銓選、名之尙左、尙右。侍左、侍右。司封、司勳、考功、凡七司。以掌文武注授到部推賞等事。戶部名爲地官、又稱民部。掌天下州郡財賦、得財用耗而復衍、倉廩虛而復實之事。禮部謂之春官、掌禮儀、討論典故、講習典禮、大朝聘禮、慶賀朝儀、生辰聖節、元旦、冬至、朝會、郊祀、明堂、合祀、天地、祖宗、典策、秋享、祭祀、社稷、封賜、祀典、祠廟、功臣勛烈配享、及賜家廟祭器等事。兵部謂之夏官、掌兵伍廂軍武舉投試武藝、金吾

街仗人司兵及大將出征告廟破賊露布鹵簿字圖若蕃夷屬戶授官封爵等事及天下地圖堡寨烽候蕃夷歸服內附皆掌之又稱駕部掌輦輅車乘廐牧雜畜乘具傳驛之政令辨其出入之數再名庫部掌軍器儀仗鹵簿法式隨軍攻城什物及供帳之事是爲四司主掌也刑部謂之秋官掌邦典之重輕民訟之疑惑重刑之出入官僚之憲讞皆主之蓋民不問大小生死事體所係四方訟刑得其平直發于天庭以稱其職唐制刑部分爲四司曰刑部曰都官曰比部曰司門是也工部謂之冬官掌工役程式及天下屯田文武官職田京都衛關苑囿山澤草木畋獵魚捕運漕碾磑之事唐制名爲四部曰工部曰屯田曰虞部曰水部一皆所總也

六部監門

六部監門在六部大門之左凡所掌之事隸于六部部門受其出入之時以聽上稽訪門之司存蓋至是而愈重矣奉行列曹之命以正胥吏之失贊長貳之懲決以遵長官之意耳六部架閣其庫在水院橋掌六曹之文書主二十四司之案牘故官置庫掌其架閣皆無失誤矣

諸寺

太常寺在羅漢洞掌奉常禮儀討論典故祭器太常樂器等事寺內有昭勳崇德閣閣上繪像文武功勛大臣自忠獻趙韓王普以下二十五人於其上也宗正寺玉牒所在太廟南玉牒建局以宰臣提舉從官兼修撰宗正卿少以下悉預修宗藩慶系錄仙源積慶圖等書檢討官亦以他職兼耳大理寺在仁

和縣西設卿少丞簿評事司直之官及治獄都轄推吏等家屬皆居于寺內以嚴出入之禁掌朝廷刑棘
廷尉之職按法斷刑治獄推劾等事司農寺在保民坊內國制以戶部掌國計而司農列卿少丞簿贊
之如諸州府縣道每年上供及宰執百官軍糧宣限米斛皆委專官吏卒下各路州縣坐徵以應宣限支
用也太府寺在保民坊內係周官職總局二十有四如諸軍諸司糧審四院左藏二庫買務賣場及編
奎兩司和劑惠民四局祇候鈔引院皆屬掌矣

祕書省國史敕令附

祕書省在天井坊之左東都建於禁中紹興間以殿司案基建省有殿扁曰右文之殿祕閣在殿後供奉
御書製書畫古器等兩廡列宋朝制書石刻國史實錄院在殿東提舉官閣在殿西道山堂在閣後東西
二閣監少之位丞簿館職閣列於兩廊堂之前著作之庭在堂後有小軒置石刻東坡畫竹于中西有四
閣著作著作佐之位國史日歷所在著作庭東廡有汗青軒編纂會要所在著作庭西廡日歷會要庫經史
諸子書籍庫共七庫俱列於殿外東西兩廡書列庫在著作庭之右後圃有翠玉堂以東坡畫竹真跡爲
屏有蓬萊亭前爲鑿池度以石橋池上疊石爲山又有亭者六扁曰芸香席珍方壺含章茹芝繹志次有
射圃矣含章亭後有渾儀基乃太史推占星象之用也敕令所在侍郎橋南專爲詳定編修諸司敕令蓋
謹法度廣賢才耳

諸監

國子監、在紀家橋太學之側、設祭酒司業丞簿等官、專掌天子之學校訓導生員之職、總掌國子太學事務、生員出入規矩、考課試遵訓導、天子視學、皇太子齒、則講義釋奠等禮也、監廳繪魯國圖、東西爲丞簿位、後看書庫官位、中爲堂、繪三禮圖於壁、用至道故事、有岡亭、扁曰芳潤、丞錢聞詩、扁以隸、古書板庫在中門內、將作監、在保民坊、設監少丞簿、掌計料、監造官司、營房舍屋、皆隸焉、蓋漢制、將作大匠、沿襲秦官、亦少皞氏以五雉爲五工正、以利器用、唐虞共工、周官考工之職也、軍器監、在保民坊、監有長貳丞簿之官、率屬治、與唐六典建官不殊、掌製造御前軍器、別置提舉提轄等官、蒞其役、近年專委殿嚴而監製本監益以省也、

大宗正司

大宗正司、在天慶坊內、以魏憲惠王府舊址築之、掌親屬宗廟之事、自漢魏隋唐迄於宋、因而不改、以皇族官位高有德望者領之、又以本族尊屬爲判本司、又增同知以爲之輔、宗司有閣、扁曰屬籍之閣、于以見宗屬蕃衍盛大而已、

省所

茶鹽所、會子所、公田所、封樁安邊所、並在三省大門內、職以都司官兼提領、舊有安邊所、創於嘉定初、專充拘推簿錄家產、更有市樁所、牙契所、後因吏胥蠹弊、走卒繁擾、遂廢其名、撥入封樁所、以併掌之、今又創市舶所、官府察見吏姦、亦行省罷矣、

六院四轄

登聞檢院鼓院始建於和寧遂移于麗正左右闕庭庭作亭之南左檢院右鼓院按唐舊制設四廳以通下情名曰崇仁司諫申明招賢進禮以使四方賢才便其上達都進奏院在朝天門外掌邦國傳送之事以鈴轄諸道傳遞官兵則周官行人其職也官告院在部門之北士大夫自一命以上至於公卿王爵軍卒一資以上至於節鉞告命皆隸院給之如文則吏部武則兵部宗戚及命婦司封屬之考校勳績司勳掌之凡四司皆集本部出誥耳元豐改制俱悉吏部行文武告命鈔而審官隸兵隸作吏部自後皆歸吏部右選文思院在北橋東京都舊制監官分兩界口上界造金銀珠玉曰下界造銅鐵竹木雜料然兩界監官廨舍毋得近本院隣牆並壁居所以防弊欺也但金銀犀玉工巧之制綵繪裝細之飾若輿輦法物器具等皆隸焉諸司諸軍糧料院在洋沙坑七官宅廢屋諸司諸軍察計院在保民坊內舊馬軍教場基置院且如糧料院者乃諸司諸軍仰上之祿均也尤不可不嚴設官置吏欲其專心致意支撥無差失審計院者自官禁朝廷百僚以下至于內侍御士及於諸軍兵卒凡賦祿者以式法審其名數而其辟召者唯郊祀賜緡已乃審祿有疑予則詔以法凡四方之計籍上于大農則遂其會凡有司議調度會賦出則諏焉樵貨務都茶場通在橋東蓋國初循唐制舊以九路之漕自達於淮去則貨茶回則轉鹽諸路留而厘之官納鈔引以便商賈但鈔引之法通行則設官專職主之課衍事繁官曹之選於斯重矣雜買務雜賣場在樵貨務內唐制謂之官市宋初爲市買司太平興國年方更名雜買務奉禁中

買賣而平其直。南渡後，合局于此。凡宮禁月料，朝省紙割，文思製造，和劑修合，封樁所積，編估以時其直，打套以籍其數，而就售焉。又置提轄總其務耳。左藏庫有東西二庫，在清湖橋。又韓世忠所獻賜第基，建庫。東庫則掌幣帛絀紬之屬，西庫則掌金銀泉券綵繡之屬。蓋朝廷用度多靡於贍兵，蜀湖之餉，江淮之賦，則歸於四總領餉諸屯軍，則東西兩庫歲入絹計者率百四十萬，以緡計之，率一千萬，給遣大軍，居十之七。宮禁百司祿賜裁三，有非泛浩繁之費，則請于朝，往往出內帑，樁以補其闕耳。封樁上庫在三省大門內，封樁下庫在藏庫中門安邊。太平庫在下庫南，蓋封樁上庫肇於孝廟之時，以備緩急支撥。又分戶部錢物隸本所，則有上下庫之別。上庫窠名者曰折帛，總制增鹽三分，鹽袋增額，不排辦人使。下庫窠名者曰養酒酒息，營田鹽場，蘆柴埧江，江沙田額，五釐關子，爲數五夥，中因文移緩弊，罅多，諸郡綱額虧數甚矣哉。

三衙

殿前司在鳳凰山八盤嶺中置衙，有御書閣，凝香堂，整暇堂，山之上爲月岩，有亭，扁曰延桂，最高處曰介亭。崖石嶙峋，亭之後爲沖天樓，極高。江海湖山，奇偉之觀。侍衛馬軍司移屯建康，以行司邊帥兼領。元有帥衙在保民坊內，改爲寺監公宇。侍衛步軍司在鐵冶嶺西，衙有御書閣，湖山堂，錦繡樓，相公井。

閣職

閣門在和寧門外，掌朝參、朝賀、上殿、到班、上官等儀範，有知閣簿書宣贊，及閣門祇候寄班等官。四方

客省館、在東華門北。客省者、掌收接聖節、建奉香及賀表、外國使人往來接伴之禮。四方館者、掌收接諸州府郡朔望正冬賀表及太禮賀表等事。御前忠佐軍頭引見司、在文思院後、有內等子營、以正廳知閣提點幕官、以大使臣爲幹辦司官。

監當諸局

車輅門外院、在嘉會置庫、安上輅及平等車。製造御前軍器所、在禮部貢院之西、改隸殿司、所管工役每季所製器納內庫、萬全三指揮東西作兩營、在所之東北。編估打套局、在支藏庫門內。惠民利濟局、在大府寺內之右、製藥以給惠民局。合暑臘藥、以備宣賜。太平惠民局置五局、以藏熟藥、價貨以惠民也。南局在三省前、西局衆安橋北、北局市西坊南、南外局浙江亭北、外二局、以北郭稅務兼領惠民惠民藥局收贖。草料場、在水院橋西、有廩十眼、受畿內所輸稻麥豆、以給驍驍御馬二院及宰執三衙之馬。合同場、在過軍橋之下、掌茶鹽鈔引合同。會子庫、在樞貨務置、隸都茶場、悉視川錢法行之、以務門兼職、以都司官提領、日以工匠二百有四人、以取於左帑、而印會歸庫矣。造會紙局、在赤山湖濱、先造於徽城、次成都、以蜀紙起解後、因路遠而弗給、詔杭州置局于九曲池、遂徙于今。安溪亦有局、仍委都司官屬提領、但工役經定額、見役者日以一千二百人耳。交引庫、在大府寺門內、專印造茶鹽鈔引、遂請丞簿僉押。法物庫、在梅家橋北、掌祭祀法服朝服冠珮帶鳥、及大禮明禪旗幡衫袍等、內侍領其職。度牒庫、在油車巷、掌僧道二流承恩敕牒。市舶務、在保安門外瓶場河下、凡海商自外至杭、受其

券而考驗之。又有新務在梅家橋北。司農排岸司。在前洋街。掌勾卸諸州郡宣限綱運。檢察搜空。而繫其不登數者。三省樞密院激賞錢庫。在俞家園。激賞酒庫。在錢塘縣南。左右騏驎二院。在漾沙坑。兩院以馬二十四疋爲額。每月朝參。各院以御馬三疋至和寧門。立于南向。朝罷回院。象院在嘉會門外。御馬院。養餵安南王貢至象三案。左右騎御直。在七官宅山上。左右教騎營。在麗正門左右。御馬院使臣營。今在嘉會門外。牛羊司。在權貨務後。掌御膳及祭之牲。有滌宮。在六和塔之南。

諸倉

省倉上界。在天水院橋北。其廩有八眼。受納浙右米以充上貢。及宰執百官親王宗室內侍。仍支給王城班直省部職員。省倉中界。在東青門外菜市塘。有廩三十七眼。皆受納浙右苗綱經常和糴公田椿積等米。以供朝家科支。農寺宣限。凡諸軍諸司三學。及百司願券。諸局工役等人。皆給焉。省倉下界。在東倉鋪。狃於舊址。極廣袤。朝家更修。乃折三之二。建廩廳八十眼。豐儲倉。在仁和側倉橋東。以公田浩瀚。諸倉不足以受納。以豐儲增。成廩百眼。豐儲西倉。在餘杭門外佐家橋北。其廩五十九眼。端平倉。在餘杭門外德勝橋東。元儲漕糴。後歸農寺。蒞以京局官而領之。咸淳重修。有木榭。扁曰介然。蓋取太倉箴語。而併箴刻於石。有廩五十六眼。淳祐倉。在餘杭門內斜橋南。元糴以儲米糴于帥司。其後朝家撥支賑糴百姓。自後付農寺。以給諸軍諸司。有廩一百眼。平糴倉。在仙林寺東。糴以儲臨安米。今農米皆入焉。咸淳倉。在東青門內後軍寨北。議增建廩。以儲公田歲入之米。買瓊華廢圃。及以內酒庫柴炭屋。

掌于帥司。建倉廩一百眼。歲貯公田米六百萬餘石。凡諸倉支納下卸。自有下卸指揮兵士。遇月分支遣。皆至祇役。又袋自有賃者應辦。如遇支界日。倉前成市。水陸壅塞。諸軍校給打諸糧。不許雇人搬擔。須親於廩中肩出倉外。此祖宗立法如此。

內司官

內侍省。知省。都知。御藥。苑使。門司。殿長。閣長。內轄。內監丞。受隨都知。下都監。儀令。上名。扶持直掌。權苑提舉。提轄。御前諸宮觀提點。皇城司。御輦馬。御馬院兼提舉。諸內司。庫藏司。所等處。更有聽喚一百員。團練四員。兩攢宮宮使。隨父指教。小直殿一百員。內宮散祇候。不記多數。各有所轄職名。主管事務。

內諸司奉安

皇城司。禁衛所。符寶所。主管大內輪匙庫。御藥院。內東門司。內通進司。御前軍器庫。容思殿庫。內藏庫。奉宸庫。內軍器庫。南廊庫。安放庫。生料庫。果子庫。香藥庫。進奉庫。殿中省。後苑。御膳所。御廚。六尚局。翰林司。儀鸞司。八作司。修內司。御前內轄司。東西庫。南北庫。甲仗庫。法物庫。蜜煎庫。內司綱房。青器窰。內司備內庫。御前應奉所。萬壽香所。御服所。裏御所。絲帛所。腰帶所。八作司。意思房。燈局所。御馬院。教樂所。天章閣。樂器庫。翰林書畫局。道場庫。祇候庫。御醋庫。主管往來國信所。東庫。御輦院。車輅院。皇城輦宮營。驛驢院。教駿營。騎從馬院。象院。大輦院。內轄司。濠寨司。織染所。奉安所。御酒庫。主管翰林醫官局。太醫局。合同憑由司。良馬院。使臣院。快行營。黃院子營。皂院子營。輕轡庫。外庫。御前諸宮觀。宮太廟營。景靈萬壽宮。老兒

營慈元殿庫。皇后殿庫。吳益國位庫。淑妃。昭容。修儀。美人。才人。諸位庫。以上並是內侍官兼職提點提舉等職。外有皇城司。御馬院。象院。係知閣。御帶環衛官兼領幹辦之職。其餘外庫院幹辦之官。係右選官領其職也。

夢梁錄卷十

諸官舍

左右丞相參政知樞密院使簽書府俱在南倉前大渠口侍從宅在都亭驛東臺官宅在油車巷省府官屬宅在開元宮對牆卿監郎官宅在俞家園七官宅在郭婆井五官宅在仁美坊三官宅在潘閣巷十官宅在舊睦親坊六房院卽後省官所居處在湧金門東如意橋北五房院卽樞密院諸承旨所居處在楊和王府西也

府治

臨安府治在流福坊橋右州橋左首亭扁曰拜詔亭右首亭扁曰迎春左入近民坊巷節推察判二廳次則左司理院出街右首則右司理院府院及都總轄房入府治大門左首軍資庫與監官衙右首帳前統制司次則客將客司房轉南入簽廳都門係臨安府及安撫司僉廳有設廳在內僉廳外兩側是節度庫鹽事所給圖局財賦司牙契局戶房將官房提舉房投南教場門側曰香遠閣閣後會茶亭閣之左是見錢庫分使庫搭材親兵使馬等房再出僉廳都門外投西正衙門俱廊俱是兩司點檢所都吏職級平分點檢等房正廳例帥臣不會坐蓋因皇太子出判于此臣下不敢正衙坐正廳後有堂者三扁曰簡樂清平見廳堂後曰聽雨亭左首誦讀書院正衙門外左首曰東廳每日早晚帥臣坐衙在此治事廳後有堂

者四。扁曰恕堂。清暑有美。三桂東廳側曰常直司。曰點檢所。曰安撫司。曰竹山閣。曰都錢。激賞。公使。三庫。庫後有軒。扁曰竹林。軒之後堂。扁以愛民。承化。講易。三堂。堂後曰牡丹亭。東廳右首曰客位。左首曰六局房。祇候書表司。親事官。虞候授事等房而已。府治外流福井對及仁美坊。三通判安撫司官屬衙居焉。府治前市井亦盈。鋪席甚多。蓋經訟之人。往來駢集。買賣要鬧處也。

運司衙

西浙運司衙。舊在雙門北。爲南北二廳。今遷豐豫門南。渡子橋西。普安橋爲東西二衙。曰東衙。有寬民堂。福星樓。節愛堂。振襟堂。堂側建別榭。曰西衙。有周咨堂。公生明堂。繡春堂。仁惠堂。堂有栽修竹而圍之。運司僉廳。提領犒賞酒庫所。俱在運司衙門。主管文字。幹辦公事。在俞家園。主管帳司廳。在戒子橋之北。

后戚府

昭慈聖獻孟太后宅。在後市街。顯仁章太后宅。在薦橋東。憲節邢皇后宅。在薦橋南。憲聖慈烈吳太后宅。在州橋東。成穆郭皇后宅。在佑聖觀後。成恭夏皇后宅。在豐樂橋北。成肅謝皇后宅。在豐禾坊南。慈懿李皇后宅。在後市街。恭淑韓皇后宅。在軍將橋。恭聖仁烈楊太后宅。在漾沙坑。壽和聖福謝太后宅。在龍翔宮側。全皇后宅。在豐禾坊南。其后戚宅。元各賜家廟五室。及祭器儀物。每四孟祭享。官給以御廚。兵治祭饌。太常寺差奉常官行贊相禮。仍差主管官影堂使臣及兵級守之。以子孫世領祠事。

諸王宮

吳王府、在後洋街。益王府、在新橋。秀安僖王府、在後洋街。漢王府、在西橋。莊文太子府、在井亭橋。沂靖惠王府、在清湖北。景獻太子府、在鐵冶嶺。榮文恭王府、在佑聖觀橋東。周漢國瑞孝長公主、在左藏庫西。各賜家廟祭器。歲時祭禮、及影堂使臣主奉官兵級等、循戚宅例制行之矣。

家廟

忠烈張循王府、在清河坊。賜廟祀循王以上五世祖。頒祭器法式。聽其自造。仍差主管一員。影堂使臣二員。兵級二十七名。以子孫帶領祠事。忠武韓蘄王府、在前洋街。賜廟祀。頒祭器。惟賜銅爵勺各一。餘竹木。頒圖飾作式。聽其自製。一應事儀。如前制同。忠勇劉鄴王府、在明慶寺南。建廟。賜祭器。並如前式。忠烈楊和王府、在洪橋清河坊。賜家廟。與祭器。下將作監造。以賜。歲時行禮。官給廚兵。太常遣贊相以奉常。餘皆如前制行。太傅平章魏國公賈秋壑。按舊典。賜第及家廟。在葛嶺集芳園。改建廟。奉五室同宇。以饗。四孟月祭器。皆尙方所賜。凡點領官吏洒掃兵士。與花果。月頒之。隸版曹及京兆府。如在京。賜諸助功廟儀式。奏行。

館驛

樟亭驛、卽浙江亭也。在跨浦橋南江岸。凡宰執辭免名。出居此驛待報矣。向有白樂天先生。往驛訪楊舊。曾賦詩曰。往恨今愁應不殊。題詩梁下又踟躕。羨兄獨夢見兄弟。我到天明睡亦無。夜半樟亭驛。愁人起望鄉。月明何處見。湖水白茫茫。北郭驛亭、在餘杭門外北郭稅務之右。都亭驛、在候潮門裏泥路西。侍從

宅側次爲館伴外國使人之地也。

本州倉場庫務

鎮城倉、常平倉、糯米倉俱在餘杭門外師姑橋鹽事所都鹽倉在艮山門外。天宗鹽倉在天宗水門內。所轄諸鹽場十有二。曰湯鎮、仁和、許村、鹽官、南路、茶糟、錢塘、新興、蜀山、岩門、上管、下管等場。又新興以下五場西與錢清二場皆隸交太場。在龍山抽解。竹木場在浙江亭北。又三場在江漲橋南餘杭塘上西口三路也。城內外場共二十有一處。以便諸官廳及民庶排口發賣。鐵場、炭場、船場、鑄冶場在東青門外北瓶場、糴場在餘杭門外賣酒局在豐儲倉邊家渡之東。交錢局在府治後都錢庫、激賞庫、軍資庫、常平庫、公使錢庫、公使酒庫、甲仗庫、書版庫、公使醋庫俱在州衙內。回易庫在薦橋北。外有公使醋子庫於城內。外十有一庫耳。或自沽賣止日納息錢于點檢所樓店務。在流福橋北有官設更令宅務合于人員收檢民戶年納白地貨錢稅務凡五處。名曰都稅務、浙江稅務、龍山稅務、北郭稅務、江漲稅務。但州府雖有稅務之名則朝家多有除放以便商賈諸貨壅於杭城其都作院在白魚池之側連司亦有木稅場在杭城外共八場也。船場與架閣庫俱在薦橋門外提領犒賞酒庫所在樓店務之側。

點檢所酒庫

點檢所官酒庫各庫有兩監官下有專吏酒匠掌其役。但新糶兩界係本府關給工本下庫醞造所解利息聽充本府贍軍激賞公支則朝家無一毫取解耳。曰東庫清糶俱爲一在崇新門裏有酒樓名之曰太

和廢之久矣。曰西庫。又名金文正庫。清界庫在三橋南惠遷橋側。煮界庫在湧金門外。有酒樓。扁之曰西樓。南庫元名昇陽宮。煮界庫在社壇南。新界庫在清河坊南。酒樓。扁之曰和樂。北庫煮界庫在祥符橋東。清界庫在鵝鴨橋東。酒樓。扁之曰春風。曰中庫在衆樂坊北。造清界。有酒樓。扁之曰中和。煮庫在井亭橋北。曰南上庫。呼爲銀鑾子庫。煮酒庫在東青門外。造清界。庫在睦親坊北。酒樓。扁之曰和豐。南外庫。造清界。庫在便門外清水閘。造煮界。庫在嘉會門外。名之曰雪醅庫。北外庫。造煮界。庫在江漲橋南。清界庫在左家橋北。酒樓。扁之曰春融。西溪庫。清煮兩界。俱在九里松大路。乃一門分兩庫耳。曰天宗庫。造清界。在天宗水門裏。煮界庫在餘杭門外。上閘東曰赤山庫。造清界。庫在赤山教場。煎煮庫在左軍教場側。曰崇新庫。清煮兩界。俱在崇新門外。曰徐村庫。在六和塔南徐村市中。其諸庫皆有官名角妓。就庫設法賣酒。此郡風流才子欲買一笑。則徑往庫內點花牌。惟意所擇。但恐酒家人隱庇推托。須是親識妓面。及以微利啗之可也。又有九小庫。如安溪。餘杭。奉口。解城。鹽官。長安。許村。臨平。湯鎮。更有碧香諸庫。如錢塘門外上船亭南。名爲錢塘正庫。有樓。扁曰先得。錢塘縣前名錢塘。前庫。鵝鴨橋北曰北正庫。正在醅坊巷口也。西橋東曰煮碧香庫。禮部貢院對河橋西曰藩封棧庫。外有藩封正庫。在常州無錫縣。並隸臨安府點檢酒所提領耳。

安撫司酒庫

安撫司所管一道酒庫。如餘杭縣閔林酒庫。石瀨步東西二酒庫。臨安縣青山桃源二酒庫。外有安吉州

德清縣市名爲德清正酒庫。五林口累曰德清東西二酒庫。安吉州歸安縣曰璉市東西二酒庫。嘉興府華亭縣曰上海酒庫。

廂禁軍

臨安居瑩穀之下。蓋倚以爲重。武備一日不可闕。而守帥所統。則建炎之舊制。至坊隅一軍。又必藉禁衛之士別爲部伍。三衛之兵。亦聽帥臣節制。以倡率之。姑以兵制軍號一一述之。使知衛兵各有兵統耳。曰東南第三將。自太祖朝。分隸駐劄。寨在東青門內。元管十指揮。後撥威果二十八指揮。雄節九指揮。於平江外。見存者威節第一、第四、第五、第六、指揮。雄節第八、第十六指揮。全捷第二、第三指揮。共統八指揮軍也。曰京畿第三將。元係東京畿縣。陳留、雍邱、尉氏、鄆陵、陽武屯駐兵。後劉俊統卒來捕。陳留存留駐劄營在東青門裏。所統武騎兩指揮。勇廣四指揮。廣捷三指揮。忠節、水軍、驍猛、神威、雄勇、雄威。各管一指揮。効忠三指揮。共統十七指揮軍也。曰兵馬鈐轄司。兵馬勇卽威果全捷三指揮。宿州龍騎歸遠二指揮。因討睦寇留屯。隸鈐轄司所管矣。曰廂軍。崇節、捍江、修江、都作院、小作院、清湖、開湖司、北城、堰、西河、廣濟、樓店務、長安、堰、閘、秤斗務、北城、鼓角匠、橫江水、軍船務、牢城。各指揮兵士計兵士一萬五百八十七名之額。曰城東、城西、外沙、海外管界、茶糟、南蕩、東梓、上管、赭山、仁和、鹽官、黃灣、硤石、奉口、許村、巡檢司、十六寨。計兵卒一千三百四十四名之額。

防隅巡警